

19 OCT 2001

Belanjawan-Reaksi (Fomca)

PASTIKAN HARGA BARANGAN MENARIK UNTUK PENGGUNA BERBELANJA: FOMCA

KUALA LUMPUR, 19 Okt (Bernama) -- Gabungan Persatuan Pengguna Malaysia (Fomca) yakin Belanjawan 2002 dapat memperkukuhkan ekonomi negara tetapi mengingatkan kerajaan supaya memantau secara rapi kenaikan harga barangan ekoran kenaikan harga petrol dan disel.

Presiden Fomca Prof Datuk Hamdan Adnan berkata, belanjawan itu seimbang daripada segi pengukuhan ekonomi di samping memastikan kuasa membeli pengguna terus kekal.

Bagaimanapun jika harga barangan dan perkhidmatan dinaikan oleh pihak-pihak yang mengambil kesempatan, ia tidak akan menarik minat pengguna untuk berbelanja dan sekaligus tidak akan merangsang pertumbuhan ekonomi seperti yang diharap-harapkan, katanya kepada BERNAMA ketika diminta mengulas mengenai belanjawan itu.

Perdana Menteri Datuk Seri Dr Mahathir Mohamad hari ini membentangkan Belanjawan 2002 dengan langkah-langkah menggalakkan perbelanjaan domestik di tengah-tengah kemelesetan ekonomi dunia yang semakin ketara selepas serangan penganas pada 11 Sept di Amerika Syarikat.

Dr Mahathir yang juga Menteri Kewangan, mengumumkan pengurangan cukai pendapatan individu antara satu dan dua peratus manakala cukai pendapatan maksimum 29 peratus sekarang dikurangkan kepada 28 peratus.

Perdana Menteri juga membawa khabar paling menggembirakan kepada 981,000 kakitangan awam dengan mengumumkan bonus setengah bulan gaji atau minimum RM1,000 di samping kenaikan gaji 10 peratus bagi tahun depan.

Hamdan gembira kerana belanjawan kali ini tidak melupakan perkembangan dan masalah sosial, sementara penduduk luar bandar pula tidak diketepikan.

Presiden Persatuan Pengguna Islam Malaysia (PPIM) Datuk Dr Maamor Osman menganggap belanjawan kali ini adalah pro-aktif iaitu bersifat meransang.

Bagaimanapun beliau meminta pengguna menyambut cabaran dalam belanjawan untuk meningkatkan produktiviti selain berbelanja secara berhemah.

Dr Maamor antara lain mencadangkan supaya satu pasukan penyelia ditubuhkan untuk memastikan cukai kerajaan terhadap restoran hotel dan kafe benar-benar dapat dipungut oleh kerajaan dan tiada unsur penipuan di pihak peniaga.

Mungkin boleh dipasang perisian komputer yang dapat memastikan semua jumlah cukai yang dikutip itu direkodkan tanpa diganggu oleh peniaga, katanya.

Dr Maamor juga mencadangkan supaya belia-belie negara ini tidak terlalu menumpu kepada mendapat latihan dalam bidang teknologi komunikasi dan maklumat malah perlu juga mendapat latihan dalam bidang pertanian.

Belia-belie katanya, boleh menjadi petani moden di kampung untuk memajukan lagi sektor pertanian dan industri makanan negara.

-- BERNAMA

AFY ZS PR